

Յոյնք՝ 60 տարիէ աւելի է որ Հէյպէլիի մէջ կառուցած են վաճառական մեծ հաստատութիւն մը :

Անարժան նախանձը՝ լծորդուելով մախացող պայքարին հետ՝ քիչ անկումներ չէ բերած Թուրքահայոց թէ՛ անունին թէ՛ գործերուն , ու այս կողմէն ո՛չ ոք օտարազգիներէն կրնայ մրցիլ իրենց հետ : Այս թերութիւն՝ չարութենէ աւելի տգիտութեան վերագրելի է , որ և հետզհետէ նուազելու վրայ է՝ կիրթ անձնաւորութեանց օրինակովն ու բազմանալով . նախանձը չա՛ր է միշտ , և չա՛րը տգէտն է միշտ , զի չգիտէ թէ բարի բնութիւնը միշտ նպաստաւոր է ամէն գործի մէջ բարի՛ մարդոց , որ բնաբար կը ներդաշնակուին բնութեան բարեբերութեանց : Թուրքահայ վաճառականութեան էական մէկ թերութիւնն ալ եղած է ան՝ որ ուղղակի արտադրող չլլալով նախնական նիւթերու և գործուածներու՝ հարկ եղած է իրեն ապրիլ միջնորդ վաճառողութեամբ , որուն մէջ արհեստապէս մուտ կը գործեն սուտք խոտորմունք և լեզուագարութիւնք քան ճշտութիւնք ճշմարտութիւնք և կըշուաչափ ուղղութիւնք : Այլ ո՛չ երկիր ո՛չ երկինք տեւապէս չեն ներդաշնակուիր սուտերուն և չարերուն հետ . ասոր համար է որ ըսուած է « Տիրեսցեն ուղիղք ընդ առաւօտս » և թէ « բարի առնի բարեաց և այնոցիկ ոյք ուղիղ են սրտիւք , իսկ թիրեալքն 'ի յափշտակութիւն՝ զնան 'ի կորուստ » : Սըր ճոն Լըպոք ալ , որ Խորհրդաբանի անդամ և Լոնտոնի առևտր . սենեակին նախագահ է , կըսէ յայտնապէս՝ թէ « գործի մարդ մը , որ միանգամայն ճարպիկ է , պէտք է միշտ մտադիր ըլլայ ամէն բանի մէջ ուղղամիտ ըլլալ » : Ուղղութեա՛մբ կրնանք յաղթիլ սուտերուն և միանալ ուղիղներուն հետ , որ միութեանց մշտնջենաւորն է . իսկ սուտին դէմ՝ միշտ պիտի գտնուի աւելի հզօր սուտ մը յաղթող , որուն դարձեալ հզօրագոյն սուտ մը պիտի յաղթէ , և այսպէս մինչև վեր-